

周李賊

觚贖云。周玉、李榮，皆番禺蠻民，以捕魚爲業。所轄船數百，其上可以設樓櫓，列兵械，三帆八棹，衝濤若飛。平藩尙可喜，以其能習水戰，委以遊擊之任。遇警，輒調遣防水鄉，賴以安輯。自康熙壬寅奉海禁之旨，於是盡掣其船，分泊海澨，遷其孥屬於城內。玉等鷓獮之性，不堪籠繫，詐稱歸葬，請於平藩可喜，許之。卽日攜家出海，糾合亡命，聲勢大張。癸卯十一月，連檣集艦，直抵州前，盡焚汛哨廬舍，火光觸天，獨於民居一無騷擾。復破順德縣，執縣令王印而去。可喜聞變，亟發舟師勦捕賊首周玉，餘黨皆散。出王令於賊舟，釋其縛，令得不死。是時尙藩諱其事，印僅罷職而已。